

## 《雜阿含 436 經》

### 四聖諦如登階梯

大正 436/印順 630/佛光 435 (諦 SN56.44,30)

如須達長者所問，有異比丘問，亦如是說，唯譬有差別：「如有四登階道昇於殿堂，若有說言：『不登初階而登第二、第三、第四階昇堂殿。』者，無有是處，所以者何？要由初階，然後次登第二、第三、第四階，得昇殿堂，如是，比丘！於苦聖諦未無間等，而欲於苦集聖諦、苦滅聖諦、苦滅道跡聖諦無間等者，無有是處。

譬如：比丘！若有人言：『以四階道昇於殿堂，要由初階，然後次登第二、第三、第四階，得昇殿堂。』應作是說，所以者何？要由初階，然後次登第二、第三、第四階，昇於殿堂，有是處故。

如是，比丘！若言於苦聖諦無間等已，然後次第於苦集聖諦、苦滅聖諦、苦滅道跡聖諦無間等者，應作是說，所以者何？若於苦聖諦無間等已，然後次第於苦集聖諦、苦滅聖諦、苦滅道跡聖諦無間等者，有是處故。」

佛說此經已，諸比丘聞佛所說，歡喜奉行。